



Giachen Antoni Berther, Rueras 1942 - 2006

bb - Giachen Antoni Berther ei naschiuns a Rueras, ils 4 d'uost digl onn 1942. El ei staus il giuven dalla famiglia dad otg affons. Il bab, Gion Antoni Berther fageva il scrinari e dasperas empau il pur, la mumma Lisabet naschida Deplaz era casarina e pura. Ei era in menaschi che pretendeva da scadin commember dalla famiglia lavur ed engaschi. Da quei temps era igl agid dumandaus ed era ils affons vegnevan buca schanegiai. En quei ambient da lavur ei il Toni carschius si. Igl onn 1959 ei siu bab morts, il Toni haveva strusch 16 onns e gest ord scola.

Suenter scola ha Giachen Antoni surpriu il pign menaschi puril. Vesend negin avegnir el puresser ha il defunct calau da far il pur e luvrau ella fatschenta da scrinari da ses frars. Quella lavur ha mai cuntentau el, aschia ch'el ei staus leds da survegnir ina plazza tier las ovras electricas Reinanteriur. Siu engaschi tier quell'ovra ha entschiet sco guardian e survigilader dil mir da fermada da Curnera. Ina lavur ch'el ha fatg cun tschaffen ed interess varga 20 onns. La Val Curnera e la region dalla tgina dil Rein cun las tschaffadas d'aua eran daventadas pil trapassau ina secunda patria el ver senn dil plaid. S'avanzaus els onns ei quella lavur che pretendeva bein enqual strapaz e che era vegnida extendida sils ulteriurs mirs da rimmada vegnida stuffia ed el ei vegnius delegaus ella centralla da Sedrun sco maschinist. Sia nova incarica ha bein pretendiu da meins strapazs corporals denton ina buna purziun engaschi spirtal cun ils indrezs tecnics ch'el ha giu da sedar giu en sia nova missiun.

Il defunct ha adempiu las incaricas surdadas ad el cun capientscha e premura, buna mein sco sch'ei fuss siu agen. Disaus persuls a casia ed onns ed onns ora quasi mo en dus sil plaz da lavur, scheva el buca bugen mulestar e cumandar auters sur da siu affar. Aschia san ins s'imaginari con vess el ha fatg da semetter en ils davos onns da luvrar ensemen en ina squadra pli gronda, denton era quei ha el dumignau. Ei era sia speciala luschezia d'astgar presentar als conluvrers ed als biars visitaders ina centrala schubra ed en uorden sco ina catedrala. El era in carstgaun da bien cor ch'ei mai senuspius da segidar nua ch'ei fageva da basegns, seigi quei sil plaz da lavur ni tier vischins. Igl onn 1976 ei sia mumma Lisabet morta. Sias soras ein segidadas cun el nua ch'ei ha fatg da basegns. Igl onn 1982 ha el spazzau la casa e construiu ina nova

sin ils mirs dalla casa paterna. Cun sia casa ha el giu occupazion avunda per siu temps liber. El era adina sil sfrac u a luvrond ni suenter ses hobis cun flurs, lavurs en iert, ni suenter siu hobi preferiu cun ses nanins el cantun denter la via e sia casa. Liung temps saveva el star cheu, cavegliond ni fagend uorden. En quei liug semanifestava il Toni dil plascher mo era quel che saveva sevilar sil peter pir. Pertgei pauper sch'enzatgi haveva la gagliarda da far disuorden en siu curtgin da nanins.

El ei selegraus fetg, el ha strusch pudiu spitgar il temps da pensiun. Plans tgei far haveva el avunda. Ed igl ei era buca stau da temer ch'el stetti lischents. Lavurs entuorn e vid la casa, zambergiar, far da scrinari, ir alla pesca, el ei staus occupaus naven dalla damaun tochen la sera.

Tgei frida ei quei stau per el, suenter dis pusinar, dad udir dil miedi ch'ei stetti buca bein cun el. El ha duvrau dis da puder serevegnir da quella nova. El patratg era el bein serevegnius da quei, mo il tgiert ha sentiu pli e pli fetg. Il Toni era spossaus, bracs e senza forza. Visetas el spital, controllas, terapias, puspei a casa, turnar el spital ed adina mendras novas. Denton la speranza ha el dau si il pli davos. Daferton che siu contuorn scheva gia pender la bratscha, plidava el aunc co el fetschi quei e tschei il temps vegnent da primavera. La speranza miera il pli davos. Senza quella massen nus pli pauc ditg e pli vess tras nossa veta.

Denton la malsogna ha dumignau speranza ed um e la notg da gievgia sin venderdis dils 10 da mars ha siu cor buca dumignau pli la lavur ed ha disdiu. Per tut ils ses che han accumpaignau el en quei grev temps e possibilitau ch'el ha astgau murir a casa ei quei stau grevas uras, grev da saver acceptar, e nuncapeivel. Mo vesend il combat dils davos dis ed jamnas astgein nus dir ch'ei seigi stau per il Toni in astgar ira. Astgar metter tut siu mal e pitir dad ina vart, saver sedeliberar da tuts quitaus per il siu, per ils ses e ver la speranza ch'ei vegni mo meglier e saver ira en la patria da Diu nies Salvador.